


浙東山水經行記

地824
925



鎮海范柳堂先生著

浙東山水經行記

鄞縣高振霄署



天台山行記自序



大凡游而不記猶之不游也故游者必記然游者明白於地難明白於文字則更難往往了然於胸中而詰屈於筆下故游者多而記者少記者多而記之明白者少夫記而不明白猶之不記即猶之不游也故若徐霞客之善游亦其文字之善於明白者歟余窶人子體素多病今年六十腳力更弱然濟勝雖無具而饒有勝情故喜讀游記尤喜讀霞客之游記然霞客兩腳行萬里平生所歷名山水無慮數十百計余何敢望其萬一顧自念一生一事無成今老矣性所好者惟名山水遠者無論若并近地之名勝而不克一游則暮景如駛急不能

天台山行記序

待非特無以自娛竊恐屬纊時目不瞑矣乃決計游山決計游天台之山溯剡溪而上抵寒巖而返往還千里費白日四十白金亦四十聊以壽我之六十此行也惟瓊臺桃源螺溪石筍三勝為暑雨疾病所阻餘凡峯之名者若華頂天柱巖之名者若赤城泗州嶺之名者若高寮羅漢金銀地寺之名者若國清善興天封萬年又若斷橋石梁之飛瀑若潛真棲真之大洞以及廣原如桐柏畏途如分水嶺一切可驚可喜者莫不印於目而證於心以此為了平生之願而即以庶幾霞客之萬一云爾若文字則早知其難而不免猶有此記者非敢自以為明白蓋游而不記猶之不游此意也余既已言

之矣乙卯七月七日野謏父自引

天台山行記序

二

天台山行記卷弟

浙東山水經行記之

鎮海范鑄壽金甫撰

乙卯五月廿八日晴西南風極大早起束裝為天台之游由平王廟東登舟屬餘姚四十里長堤屬上虞時霖雨之後水從堤上流二十里小越小越西有小湖青山四圍中有野屋夕陽在嶺清風徐來風景頗清幽又二十里至百官昏黑久矣是日風水俱逆又為捐卡留難致行舟到遲登岸飯於谷家過塘行畢搬行李登江船解纜行里許泊龍山頭推篷露坐江風送涼四鼓舟復解纜行

天台山行記

廿九日晴曉睡正酣驚聞舟行已四十餘里亟推篷起看則兩岸送青一江流碧昔讀崔灝剡行詩有青山行不盡綠水去何長地氣秋猶溼江風晚稍涼云云今身到乃知崔詩之工地名霸王山山在江右岸已過湯浦口五里矣又五里為王家匯在江左岸石壁插水底灌木翁之中露小樓亦江濱佳處也又三十里章家埠為上虞屬之大鎮舟人泊舟午炊飯畢復行七里石山廟八里三界為上虞山陰嵎之交界亦濱江繁鎮也五里釣魚臺為謝客遺蹟山右麓有小溪入江溪口有小橋仿佛雙流會江桐梓南樓之勝槩自釣魚臺而上三石頭而下江山蟠曲奧衍靈秀瓌奇甲天下三里上下馬輿雪湍截巖煙邨夾水又里許許巖石山顛有龜鼉將軍廟紅牆

朱扉倒映江水里許棗樹灣平林帶江小樓倚山皆江左岸
里許江右眠蠶山石骨楞楞聳翠里許江左清風嶺為
主烈婦沈江之所山半有亭山麓有廟皆名清風山水
稱其人已又里許下洋埠泊舟四山落日紫翠滿目枕
樓徙倚朗詠呂衡州舟移鏡裡路入畫中之句信乎山
水有靈當驚知己時沿江多盜中夜見山徑火光閃爍
人聲隱隱同舟俱起共有戒心

六月初一日晴舟拂曉行西南風緊涼甚五里江右畫
圖山石骨為叢木蔽虧未見青蒼惟尖峯獨秀耳三里
仙巖又五里三石頭皆江左三石頭為酈道元所記者今
水石依然而朱碧無存矣沿江一綫即甯紹台温處五

天台山行記

二

屬之大道也百官舟至此止行李換竹簾上嵒余同姊
夫葉鶴亭雇高轎陸行二十五里午至嵒城東門外之
杜家過塘行飯午後暑甚遲至日斜入東門北行登山
觀城隍廟廟壯麗左為縣署右為新闢公園憑高眺遠
城內外一覽而盡歸寓已曛汗夾背矣飯畢坐江濱納
涼遙望東南三峯高尖主人云四明山也三更行李簾
到檢點畢始就寢

初二日晴黎明起粥罷仍乘高轎而行過南門橋石為
之橋下水自西南來者兩頭門港即西谿也過橋東折
北至東門橋南而新昌港合澄潭港來會之過橋而
北稍折而東又過木橋而南行此橋下水
即新昌港共二十里至
黃泥橋是為新嵒分界處又五里過一山嘴路左巖裂

一罅寒泉涓涓從中出上有塔是名塔山又五里過長板橋仍南行有邨是名山溪又十里過大佛寺頭門大溪至此曲而東路亦東折而入新昌城之西門里許卸擔於五昌錢鋪日尚未中飯後移寓吳興公所晚陳君蕙堂來飯而去夜中熱甚露坐達旦始眠

初三日晴早起周君生義及俞某來午飯而去俞生松銓來晡時聞雷有風無雨然天氣稍涼晚飯畢即眠初四日晴早起出東門沿城北行折而西過北門再折而南過西門初出東門時見大溪自南來北流折而西至城西北隅又折而北去途中左並城右循溪桑園竹徑涼綠陰沈既過西門折而西南至地藏殿東嶽廟少

天台山行記

三

憩仍由西門返寓昨以客中無書向俞某借公羊小戴抵寓而俞氏已遣人送書來又荷周君贈白雞一雙夜聽茶客潘芝田儒舉人譚穿巖十九峯之勝為神往者久之是日得張君讓三及濬兒信

初五日晴午後館人呂某以新邑先進俞秋農先生宦游圖見示計八幅其目為窮巷書聲水簾觀瀑第東山板滕閣臨江湘江夜泊第飛雲古洞苴蘭泥爪獅山聳翠嶸無溪登岸桃源仙蹟洞庭秋泛蹕天姥歸雲台山積雪沃洲垂釣嶺揚江晨渡文德探奇七里魚謳梯龍洞雲深第首尾有山陰王兼遵義鄭珍題跋書畫俱可觀

初六日晴趁早涼訪陳君蕙堂回途過煙業公所訪周君生義坐譚少時周君贈石二一佳遂捧石回寓

初七日晴萬年寺方丈妙瑞上人來期以十三日入山
初八日晴早起出南門西行折而南過大佛寺橋登小
嶺嶺上有亭近為龍尾掀去瓦石掃地無存過嶺南下
磴道陡甚游千佛寺即千佛巖也又折而東里許游南
明山寶相寺即大佛寺也二寺皆嵌巖為殿琢石為佛
而寶相尤壯偉金身高六七丈門前二沼一大如小湖
少陵云殿腳插入赤沙湖於此仿佛見之米元章書南
明山三大字石刻在寺門左其南字係後人補者日漸
高乃返寓

初九日晴

初十日午後有小雨得濬兒信

天台山行記

四

十一日晚飯後大雨旋霽是日發家書

十二日晚又大雷雨萬年寺轎夫來乃治裝為明晨入
山計

十三日晴早起粥畢乘高轎出舊東門東南行沿路水
石並佳左溪右巖竹樹陰中一徑逶迤即走班竹之官
道也五里至平川橋轎夫忽病霍亂轉筋勢危甚乃歇
轎於涼亭遣擔行李者入城再雇轎夫遲至日午始到
因留前轎夫之無病者調護病夫於亭中給以宿飯費
而後始得乘轎前進又十里黃婆亭大邨也過黃婆亭
三四里許路入夾山中旋過兩小嶺自嵯縣釣魚臺以
上兩山如衙至三石頭而山始開洋至此而路旁兩山

又逼雖同為峽中之水特彼為江而此則溝耳又六七里許攢峯刺天上下蒼蒼漸入佳境矣又三四里許過大石橋橋之東一峯卓筆橋之西山坳有屋竹樹蒼然也是為上下赤土邨邨盡而至燕窠邨水蟠山璣真燕窠列笏如朝佛遙望東南一纈峯亭亭天際問知其下即班竹又五里而後至地勢雄壯左右高山如牆前有會墅嶺通台州大道後有小山口地名橋頭寔為天台山北門之璣鑰又五里而至會墅嶺脚又五里登嶺頭即為街口當在會墅嶺北時東望芭蕉山一帶峯巒皆稜稜直上競秀爭雄從街口南行有歧路歧而西南者五

天台山行記

五

里而至儒輿余從東南歧里餘而至太平菴一名紫竹菴止宿日尚高菴頗宏敞修整脩竹滿山坐既定而雷雨大作一時許而霽主僧靈透出而接譚遂同晚飯飯後又少坐而就寢

十四日早起食糜粉畢靈師贈壽星杖遂揖別上轎東南行三里橫板橋小市耳橋乃石想古以木為之臨橋路歧歧而西南過橋者關嶺道也余往萬年寺則由東南歧二三里許灌園廟五六里許滕公山邨又里餘而入清涼寺飲茶少憩隨喜寺中瞻眺五百羅漢堂而出寺門即上牛牯嶺一名滕公嶺蓋此山名滕公山徐霞客游記作騰空山而牛牯嶺作牯牛嶺嶺高且長曲折十數嶺半一支岡東出中有小坪

如掌碧草如茵時涼飈驟至熱意全消乃藉草而憩坐對壑南諸峯如展開五老峯橫幅回首北眺則會豎嶺來路諸山如案上餽釘羅列滿前及登岡西望而關嶺燕山儒輿一帶又煙雲在眼可謂勝觀矣路旁多朮田岡行十里許而入地藏寺飯焉寺基高爽大殿亦壯偉惜寺古年深梁棟已朽蠹支以白木岌岌可危語云大厦將傾非一木可支者此之謂矣臨飯頃而萬年轎夫來蓋病者已愈乃回城夫而以原夫行八九里許至大風川有涼亭少坐望前山雲似墨知復有雨亟過川下一嶺陡甚且長五六里而後及平地未及平地而雨至既及平地而寺至既入寺而雨止蓋萬年寺在四山之

天台山行記

六

谷底蘇詩所云寺藏巖底千萬仞路轉山腰三百曲者儼為萬年寺寫照寺宇內外闊大雄壯八峯環拱中

志云八峯山中有萬年寺八峯者所謂明月古杉參天

水田彌望信為東南千古名藍惜自天王大雄二殿親

到羅漢二堂外殿堂樓閣大半傾圮主僧妙公方謀興

葺之余既卸擔有明持上人者華頂寶蓮菴常住與邀

至親到堂啜茗親到者宋仁宗賜萬年寺遂下榻於堂

中日色尚早因徧觀寺中天王殿門萬年寺三大字彌

勒龕前聖言飛玉相帝語重金輪十字俱無名字而書

法團結疎散各臻工妙法堂有王文治書令法久住親

到堂有王校書真印獨持扁榜亦佳按扁聯書法之工之多天台山中當

以桐柏宮為最又客座有講華寫贈梅巖和尚墨竹一幀題云王者有至德甘露降則竹葦受之居然書畫詞三絕晚寺僧具清品供饌

十五日早起禮佛畢食蕨粉較勝太平菴出寺東行數里下道人嶺音土又數里逾關洋嶺音土嶺西有溪橋東有涼亭又數里逾水壺嶺較高前二嶺自萬年來途徑蟠屈忽東北忽東南總之不離東北向忽升高忽墜淵總之不離山縫中至此而山稍開復東北行過石橋南仍東北經臻福菴共三里許而上短棒嶺逾嶺東南下忽聞水聲潺潺曇花亭見眼前亭遭火重建則已至中方廣寺矣即古石橋寺亟下下方廣寺即古石橋菴卸擔不茶不沐而復

天台山行記

七

上中方廣審視瀑之來處蓋石梁之上有兩瀑焉東南隅之瀑由上方廣寺前下墜而出曇花橋西南隅之瀑由短棒嶺下出奇觀橋而下墜二瀑合而東北流其形如丁字乃復墜石梁下而去余過奇觀曇花二橋從曇花亭前之右折東下石磴數十級至梁南端有石柱乃倚柱而坐觀北端盡處有巨石阻道石上置五百羅漢銅殿殿乃一小龕聞其中羅漢大才如指耳時水小瀑流不壯且草樹蒙籠梁下亦未能一覽了然為悵復沿溪東行觀蓋竹洞返仍過曇花亭由東南隅盤至西南隅而西南瀑旁石壁有第一奇觀四大字道古絕倫當為山中磨崖之第一草草游覽畢返下方廣飯飯後登

寺後上方平眺一峯如卓纛當前斜瞻曇花亭已在高處石橋寺後巖石玲瓏葱蒨鬱鬱然下樓復前行仍過奇觀橋自此東南行入上方廣寺茗憩門前水石更幽奇又東南五里仰天湖路右俯視絕壑萬尋四山團裹杳冥深沈仰天湖所由名歟又五里挈桶檔兩山壁削一岡中接地不文闊左右顧目眩心慄腳掉不能立故名又聞此地有大風雨雪不能行人云過檔有亭少憩又四五里許由小徑左入寶蓮菴是日明持上人同來故迂此茗叙臨行明師贈野朮一枚野鴨形異物也珍謝而別半里出大路又東半里至善興寺寺燬後重建頗壯麗然氣象不若萬年多矣由寺東側東北下曲折

天台山行記

八

二里而至天興菴卸裝妙公之靜廬也寓余於北樓牕外竹蔭綠沈蟬聲嘒嘒旅懷為之洒然是日止行三十里故到天興不過未刻耳因周觀內外菴處善興之東偏佛堂東向余寓樓西南望天柱峯咫尺耳疑即俗所稱鉢孟峯菴雖小而清華土本丹堊無一不工緻即下至庖園亦非草草為之者

十六日早起禮佛雨時作時止午後開霽乃襍被上頂行近善興寺而大雨至亟避於山門久之霽向寺前觀萬工右軍二池伏虎亭在池東方新建未落戈既而由善興西北過寶蓮菴而向清隱菴雨又至亟入門履襪濡矣至夜風雨更甚遂宿焉菴枯寂陰森令人悽然不

樂中夜聞大風雨聲旅枕展轉不成寐是夜東南沿海數省遭颶灾生
命財產傷損不可數計而余在華頂竟不知也詠白傳
當君白首同歸日是我青山獨住時之句不勝太息
十七日早起風雨晦冥萬山混茫一物不見一步不行
連日雨坐窮菴景况淒清宛如霞客之在翠峯也晚晴
散步至寶蓮菴路口而回回至清隱菴路口不入又北
行數十步得茆菴二極小戶俱鍵四顧闐無人方塘中
菱花搖風偏反若有情乃返昨冒寒雨夜遂發熱今日
食粥而已夜牕復無月

十八日晨又雨晦不能上頂悵然者久之按天台一山
中市場耳故嶺有金銀地之號土產山螞蝗噬人血猝
不能脫可畏也又有蜂蟻形如蜂多如蟻即山螞蝗亦

天台山行記

九

畏之矣午霽見日乃令平頭肩杖挑黃縣襖子離菴至
善興東側路歧處一東北下天興菴道一東北上拜經
臺道也時雲日開閉倏忽陰晴不定躊躇久之乃決計
向上拚兩宿絕頂亦勝連夕枯坐寒茆也始東北繼西
北過善興寺後山來龍處乃正北上至太白堂蓋三里
云過黃經洞路口不入又北上里餘始登頂頂乃一東
西行橫岡闊才十餘丈稍折西而南入小石堡北門是
為拜經臺臺北向門有隋智者大師拜經臺八字碑卸
包函出堡環觀惜乎雲日閃鑠衆山隱見迷離而眼前
數尺外雲陣紛馳而過蒼黃白黑有如車騎隊伍旌幡
幢蓋之形者真瑰觀也欲尋降魔塔無覓處東行岡頭

欲登望海尖荒草茫茫無徑而返入堡茶坐欲宿此觀海日僧下逐客之令乃背包出堡擬下山則雲日頓開碧天如洗八面萬山簇簇如筍洶洶如波濤信所謂千巖萬壑應接不暇而斷非筆舌所能擬議形容者吁真大觀也余環堡周行見環頂皆高山無一罅何處見海然則拜經臺觀日出亦未必佳勝而余之所得者已多矣遂暢然意滿拄杖而下兩腳頓輕到天興不過申刻耳

十九日晴午飯畢為天封之游拄杖由菴前小路東南下下陡級里餘而會善興來之大道自此東南向兩山如巷挾溪中流由巷中曲折行三四里許乃出過石橋

天台山行記

十

又東南里許而至天封寺寺前伫眺四山如城形同萬年霞客所謂台山幽絕處者入其寺則敗矣壞矣靡孑遺矣惟餘大殿支以衆木尚未倒然亦旦暮間事耳為之悽然而返循故道過天興菴前小路口不入走大道西北上天柱嶺嶺半有瀑亞石梁山徑斗絕處有瞽者拄杖下乃知瞎馬深池未是險語將近嶺顛有小橋是為善興前之第二池善興道不過橋余瞻眺橋上見天柱峯從人面起乃迂道過橋東南行又折而西南蟠峯腰三曲由天柱背達其面而至永慶寺渴甚少憩飲涼茶數甌適太平菴僧靈透亦在此遂相與坐談既而興辭出過第二池之橋登嶺頂是為善興前之第一池亦

有橋焉自天興路口至此約二里許又折東北數十步即善興寺門矣復息脚力乃歸天興余前日由善興下天興曲折數里以為墜谷底數百丈矣今由天封回途繞道天柱峯腰隔壑望天興諸菴迴出高山上若由天封視之當更不知若何巍巍而山外平地無論已

二十日晴早粥畢乘轎過善興寺前西南至挈桶檔有歧路西北向方廣道即余前日所來者今向西南行里餘路左得古華嚴寺廢址望隔山竹樹云是雙溪邨裡舉檔東涼亭前則正對其外舉又西南八九里而登察嶺頭又西南五里下嶺脚而至龍王堂有邨店八九家乃歇轎向許姓酒家沽飲承許君導觀邨外見四面山

天台山行記

十一

坪大開水田漠漠宛如郊野光景幾忘其在萬山頂上也忽聞書聲琅琅疑為高察書堂詢之乃知又有小學堂入而觀之晤校長陳君子安暨教習某君禮貌俱殷勤詢陳君知校名習雲云此地有習雲洞學額四十皆近山邨

童時教習方對諸生說唐太宗皇帝故事二者皆為深山中異事又承陳許兩君口講指畫乃知龍王堂為山

中總匯縮藪之區邨當三岔路口南向者國清寺道也

北向者亦有歧路方廣及羅漢嶺道踰嶺即向萬年寺東向者華頂

道即余今日所來者東北至善興十五里正北方廣西北萬年如之而善興至方廣方廣至萬年亦俱十五里云蓋此地形如北向而展摺扇龍王堂為扇根善興方

廣萬年乃扇之面也而國清道則又如摺扇之施柄耳
諦審既畢乃南行歷大寒風陳田洋冷水坑小寒風水
磨坑共十里而至真覺寺是為銀地嶺於是歇而謀午
飯高明寺通霖上人者適在此具袈裟相迎入方丈茗
叙復導觀寺宇智者大師真身塔即在大殿中故俗又
稱塔頭寺禮佛而飯飯畢而出寺東行過大慈寺門前
寺已廢不入又東觀大字巖兩座佛隴兩字高妙惜半
已模糊天台山三字能品而已再東觀智者說法臺乃
山頂一石砥平方數畝旁有巨石圓如卵號為飛來亦
可異云還寺復出寺南半里至路歧南向者國清道也
余則東南下高明寺五里而至關麓為廣場冠巖為重

天台山行記

十三

樓處處高明寺名洵不忝矣向香積廚後東北行里許
游圓通洞洞北向三石磊成石縫尺闊為之門洞前層
巖疊嶂矗翠橫青恐海岳研山無以過之日已西亟循
故道還至金地嶺顛會國清大路嶺上伫眺見山外黃
白一綫云是大溪過府城出海門者下嶺有新舊二道
余從舊道南下五里至嶺腳有亭少憩復屈曲東南行
約五里許漸覺水石竹樹幽秀異常過小石橋又南行
折西而北則已至豐干橋而為國清寺門矣入門寺僧
達智引至方丈後而下榻焉晚飯畢亟過寺前橋審視
寺東側來時路恐山門閉山中人閉復忽忽入寺周覽
四天王雨花大雄三殿及兩廊諸處壯麗為一山之冠

既又西至三聖殿觀右軍鶯字碑係天台關古堂壽人氏重樵上石者觀未畢寺僧本揚邀登樓坐譚坐未定報方丈顯勤法師在寓房坐候因回叙譚良久而罷乃整裝為明晨入寒明兩巖計

二十一日晴早起禮佛飯畢乘轎出國清西行日卓午計五十里而至坪頭潭市中買米向旅店打火未到坪頭六七里許十字路口

東西者國清向坪頭南北者關嶺向台府之道也

有亭

亭南岡上有無雙巖突兀異甚若巨靈高掌捧一桃置案上然坪頭潭市街甚長飯畢復西南行十餘里至茅洋有峯三角形在其南北望一峯卓如塔獨出衆山上並不知何名也

如塔者疑即青山山岫

既而至邨西茶亭少坐念轎

天台山行記

十三

夫於兩巖之路未熟終恐誤事乃於邨中覓一齊姓老者為導按茅洋之西有大溪自西南來由東北向折而東南去而上流復有方莊溪自西來會之余隨導者初過方莊溪之石橋繼步涸灘溯大溪而西南行四五里許又有西來大溪會之

按此溪疑即霞客所謂有大溪西自東陽來大若曹娥者蓋

西溪南岸嵌巖置屋者是曰山頭下而南溪西岸广厂穹窿如飛檐反宇前復有一圓石屹立溪中石脈一縷綴著岸若以絲組繫玉墜又如驪龍頷下珠然蓋巖石嵒砢如龍張口也是曰泗州巖其間水石奇麗光景靈異迥非人世當余初至雙溪口時西溪中涸成洲惟兩旁各餘一溝乃再度板橋而過之緣西溪南岸東行復